

史料旬刊

第三十二期




中華民國二十年四月十一日出版

史料旬刊第三十二期

編輯所 故宮博物院文獻館

發行所 神武門外發售室

印刷所 京華印書局



		費 郵		表目價	
		外埠	國	四角	每旬一冊
本市	每旬	一角	六角	四角	每旬一冊
	每旬	二角	六元五角	十八冊	預定半年
	每旬	二角	十二元	三十六冊	預定全年
		<small>本院發寄刊物均交郵局掛號遞送以免遺失</small>			

商務印書館 中華書局

上海 文明書局 世界書局及

天津 其他各大書店均有代售

史料旬刊第三十二期目錄

清惇親王綿愷府第厲園囚禁多人案 原件藏大高殿

(一) 都察院摺

(二) 載銓等摺

(三) 上諭

(四) 上諭二

(五) 步軍統領衙門摺

(六) 上諭三

(七) 上諭四

(八) 上諭五

(九) 宗人府摺

(十) 上諭六

(十一) 穆彰阿等摺

(十二) 上諭七

(十三) 上諭八

(十四) 宗人府摺二

(十五) 上諭九

(十六) 上諭十

清乾隆朝福建督撫伍拉納浦霖等受賄被誅案 原件藏大高殿

(一) 長
魁 麟 倫 摺九

(二) 長
麟 片

(三) 長
魁 麟 倫 摺十

(四) 玉
海 摺

(五) 廷
寄

(六) 廷
寄二

(七) 長
魁 麟 倫 摺十一

(八) 廷
寄三

(九) 蘇
費 凌 阿 摺

(十)汪志伊摺

清道光朝關稅案 原件藏大高殿

(一)達 三片

(二)福 森摺

(三)成 剛摺

(四)惠 顯摺

(五)惠 顯摺二

(六)上 諭

(七)李鴻賓摺

(八)達 三摺

(九)達 三摺二

(十)達 三摺三

(十一)上 諭二

清惇親王綿愷府第厲園囚禁多人案

都察院摺

都察院左都御史奎照等跪奏爲奏聞請旨事據民婦穆陳氏以切膚沉寃被夫休棄等詞赴臣衙門具控臣等公同訊問據該民婦供稱年二十九歲氏夫穆齊賢現年三十八歲向在惇親王府當差上年在府囚禁多日至七月十四日請假省墓有解差文玉押送回家氏夫因在府中無故獲咎不敢再往於十九日夜間潛逃出門至山東登州府躲避本年二月間府中追尋氏夫下落經族姪穆鶴年寫信寄往山東向氏夫告知五月初五日氏夫回京向氏聲言日內只好進府惟此後夫妻必難見面痛氏窮苦無依寫就休書一紙令氏改嫁氏夫即於次日投至府中近日探知在府囚禁奄奄待斃氏痛夫情切爲此赴案呈訴等語餘與原呈大略相同查該民婦穆陳氏既經呈控臣等不敢壅於上聞謹將原呈一紙暨各項控單一併恭呈御覽爲此謹奏道光十八年五月

二十二日

都察院左都御史臣奎照
兵部尚書署左都御史臣卓秉恬

左都御史臣姚元之未到任
左副都御史臣宗室善燾

載銓等摺

奴才載銓奕紀聯順隆文跪奏爲遵旨查拿人犯恭摺覆奏仰祈聖鑒事本月二十二日奉旨分往惇親王綿愷寓園府第兩處按單查拿人犯當經軍機大臣將原單交奴才等奴才載銓隆文即日同往惇親王寓園面見惇親王按單開各屋逐間查看所有單內各犯俱不在屋內旋經惇親王交出索呢歡等十六名奴才等遂名點驗單內有名者十三人單內無名者三人共起獲十六名一併交中營副將蔣百齡看管此外尙有單開未獲者六名由府第起獲二名實未獲四名並據惇親王告知太監李秋澄現在告假進城並未在園奴才奕紀聯順即日遵旨同往惇親王府第按單開各屋逐一查看起獲單內有名者三十一名單內無名者二十九名另獲唱戲人二名並拿獲每日稽查畫押人希孟一名共起獲人犯六十三名此外尙有單開未獲者十名由寓園起獲二名實未獲八名當將所獲各犯就近交步軍統領衙門看管至太監李秋澄一

犯並未在府第奴才聯順隆文當即密派番役前往該太監家內查拿尙未獲到除將已獲未獲人犯另繕清單呈覽外所有奴才等查拿人犯緣由恭摺覆奏伏乞皇上聖鑒謹奏道光十八年五月二十三日

清單

計開

寓園起獲原單有名者十三名 太監孫壽增 太監陳泳太 索呢歡即成

存 文祿 錢寬 鍾祥 德善 富安 王勳重 德順 德海 定柱 係府

第單內有名者 穆齊賢 係府第單內有名者

寓園起獲單內無名者三名 霍隆武 雙桂 倭隆阿即明汴

寓園單內有名未獲者四名 扎拉杭阿 王姓 張三 太監王安

府第起獲原單有名者三十一名 雅爾哈 愛興阿 阿洪阿 文俊 善

亮 長安 長春 長順 壽善 明玉 雙柱即咸壽 圖他布即延壽

祥太 朱文善 祿善 性善 安善 安良 善明 太監張安太 太監

張三登 太監怡安 太監劉泳順即平兒 太監王春年 太監史恒安

太監許長壽 太監高松林 太監韓壽芝 太監段雙喜 太監劉明 太

監董秉成

府第起獲單內無名者二十九名 杜奎 陳泳升 興海 富呢雅罕 太

監田沛霖 得倫 達明阿 得奎 何長山即台斐音 八十七即定春

安喜 郭明阿即延年 靜壽 咸安 太監王咸 郭隆阿係太監李秋澄私禁 尙

安太係太監李秋澄私禁 明通寓園單內有名者 胡圖靈阿寓園單內有名者 太監金得祿 太

監崔逢年 太監李春和 太監宋福祿 太監平安福 太監劉壽山 太

監孟慎德 太監田德玉 太監吉迎祥 太監白萬清

府第單內有名未獲者八名 壽普 全安 塔克清阿 曹姓 柳姓 德

隆 太監龐眉 太監張如瓶

府第起獲唱戲人二名 全順即安保 全路即定保

上諭

道光十八年五月二十三日奉旨昨據都察院奏民婦穆陳氏以伊夫穆齊賢

在惇親王府內囚禁等詞赴該衙門呈控當即派載銓奕紀聯順隆文分往惇親王寓園府第將單開各犯按名查拿本日據載銓等覆奏並開單呈覽所有寓園起獲原單有名者十三名單內無名者三名府第起獲原單有名者三十一名單內無名者二十九名及現獲之全順即安保全路即定保希孟著交軍機大臣會同刑部隔別嚴訊務期水落石出斷不准稍有不實不盡其未獲之太監李秋澄並寓園單內有名未獲之扎拉杭阿王姓張三太監王安府第單內有名未獲之壽普全安塔克清阿曹姓柳姓德隆太監龐眉張如瓶著步軍統領衙門順天府五城迅即嚴拿務獲歸案審辦欽此

上諭二

道光十八年五月二十三日奉旨太監李秋澄著惇親王迅即交出歸案審訊毋許遲延欽此

步軍統領衙門摺

奴才奕經等謹奏爲拿獲奉旨交拿人犯事本月二十三日戌刻據八品銜番子陳裕在德勝門外離城三十餘里七里渠地方將太監李秋澄拿獲又據步軍校雙壽番子頭目趙全在西直門內椿樹衚衕李秋澄家將太監龐眉拿獲其餘人犯奴才等仍嚴飭旗營番子等迅速嚴密緝訪務獲外相應請旨將太監李秋澄龐眉交刑部歸案審訊爲此謹奏

上諭三

道光十八年五月二十四日奉旨太監李秋澄龐眉均著交軍機大臣會同刑部歸案嚴審八品銜番子陳裕獲犯尙爲迅速著加恩賞給七品銜以示獎勵
欽此

上諭四

道光十八年五月二十六日內閣奉上諭昨因都察院奏民婦穆陳氏呈控悖親王府第寓園囚禁多人當即派載銓等前往分別起獲各名較之所控單內

幾至兩倍現已交軍機大臣會同刑部審訊該王理應具摺請罪乃於次日呈遞摺件並求召見朕未經允准本日朕在出入賢良門閱看兵部引見人員該王亦未免冠叩頭請罪實屬胆大無禮惇親王綿愷著交宗人府先行議處嗣後該王如有呈遞摺件奏事處不准接收儻在軍機處遞呈軍機大臣等亦不准接收欽此

上諭五

道光十八年五月二十六日奉旨民人壽普壯丁趙長興太監張如瓶著惇親王迅卽交出歸案審訊毋許遲延欽此

宗人府摺

宗人府左宗正和碩肅親王臣敬敏等謹奏爲遵旨議處具奏事道光十八年五月二十六日內閣奉上諭昨因都察院奏民婦穆陳氏呈控惇親王府第寓園囚禁多人(中略見前)欽此欽遵抄出到臣衙門臣等查則例內載王公遇

有罰俸案件係私事俱罰伊王公俸係公事俱罪職任俸等語今和碩惇親王綿愷於府第寓園囚禁多人被民婦穆陳氏呈控該王並未具摺請罪恭遇聖駕亦未免冠叩頭請罪誠如聖諭實屬胆大無禮欽奉諭旨交臣衙門議處臣等公同酌擬若僅照尋常罰俸之例議處似不足以示懲儆應請將和碩惇親王綿愷實罰親王俸三年雖有紀錄不准抵銷所有臣等遵旨議處緣由是否

有當伏乞皇上訓示遵行再此摺臣衙門宗令和碩惇親王綿愷例應迴避未經列銜合併聲明爲此謹奏請旨道光十八年五月二十八日

左宗正和碩肅親王臣敬敏

右宗正和碩睿親王臣仁壽

左宗人多羅貝勒臣綿偲

右宗人固山貝子臣綿岫

上諭六

道光十八年五月二十八日內閣奉上諭前經降旨將惇親王綿愷先行交宗人府議處茲據敬敏等定議具奏綿愷著革去內廷行走宗令都統閱兵大臣及各項差使仍照議實罰親王俸三年不准抵銷欽此

穆彰阿等摺

大學士軍機大臣臣穆彰阿等謹奏爲會同訊明定擬具奏事竊照都察院具奏穆陳氏呈控切膚沉寃被夫休棄等情一案前奉諭旨派臣等會同審訊遵即督率章京司員提集全案人證查照控情逐款隔別研訊業經摘叙簡明供單奏蒙聖鑒在案茲復按款逐加核訊如所控惇親王將前奉懿旨放出優伶拘回在府藏匿一款訊據太監鍾迎鸞供稱道光十二年正月間總管太監王德恩首領太監黃德福面奉懿旨令惇親王將園內居住之優伶全順全祿及府內關禁之人一併放出惇親王當將在府關禁不記姓名十餘人釋放其全順全祿二名令伊與太監劉泳順送至其戚白姓家暫住一日旋即送入府內東書房藏匿屬實并據全順即安保全祿卽定保供明伊等於送入府內以後經惇親王賞給全順四品頂戴全祿六品頂戴並令在彼服役之性善等稱全順爲大爺全祿爲三爺均自稱爲奴才各等供隔別訊據劉泳順性善怡安白萬清雙喜韓受芝吉迎祥等供俱相同又如所控該王府護衛引見冒名頂替

及官員病故未經報部開缺仍支俸銀一款訊據驍騎校拴住虛銜護軍校全福供稱十六年十一月間王府出有三等護衛一缺惇親王將瀋陽莊頭六品典儀徐之清卽哈興阿擬正投充包衣護軍校馮寶文卽寶文擬陪因哈興阿路遠趕不到京寶文又臨時患病諭令拴住頂替哈興阿之名全福頂替寶文之名代爲引見伊等不敢違拗曾經冒名引見一次至三等護衛訥楞額五品典儀金文鈺係於十五六年間先後病故王府並未報部開缺直至本年春季仍行領俸等語並據六品虛銜巴克清阿供認伊於十六年十一月間曾經惇親王諭令代保送三等護衛擬陪之護軍校周廣勳冒名引見不敢違拗嗣因擬正之福祿撤退至今懸缺未補伊亦未經代周廣勳引見傳到周廣勳供亦脗合當經片行兵部查明哈興阿等引見年月日均屬相符並調取戶部該王府官員春季俸冊實有訥楞額金文鈺二人之名臣等以拴住等冒名引見是否惇親王主使並訥楞額等每季所領俸銀拴住等有無從中侵蝕情弊至該王府官員多有罰扣全俸及僅給半俸之員其扣存銀兩究係何人留用均須查詢明確方昭覈實當卽傳到該王府門上頭等護衛郭升阿飭令稟詢惇親

王切實聲覆以憑核辦旋據覆稱前項冒名引見各員均係奉惇親王之命其
訥楞額等冒領俸銀及該王府官員等罰扣銀兩亦均係惇親王留於府內抵
補虧項等情其爲拴住等並未侵蝕似無疑義又如所控惇親王信用太監李
秋澄種種不法等情一款訊據李秋澄供認伊於十六年間因派查已革護衛
李崑虧空各款辦理認真經惇親王派管府務旋因經管米石地租積有羨餘
惇親王益加信任府內官員兵丁等均稱伊爲大人並給伊站道請安伊曾奉
惇親王面諭將頭等護衛郭升阿板責其餘官兵太監等經惇親王令伊監視
責打者無數至郭隆阿尙安太二人委係伊私放私圈伊吸食鴉片烟已有多
年等語傳訊郭升阿據供因被李秋澄查出誤差立即責打十五板其如何向
惇親王回稟伊實無見聞訊據跟隨李秋澄習禮之太監劉明龐眉僉供目覩
李秋澄吸食鴉片烟情詞甚爲的確又如所控惇親王將民人盧歡囚禁凌虐
致令服毒身死一款訊據屍兄盧二供稱伊胞弟盧歡於十七歲時進惇親王
府服役嗣因被責逃出旋被拿回十五年十二月間王府給伊送信以伊弟猝
患暴病令伊接回調治伊隨同進園將伊弟抬回家內當即身故伊與伊母李

氏看明伊弟十指發青兩眼不閉情知身死不明因畏王府不敢控告等語當向鍾迎鸞訊明盧歡於逃走拿回後經惇親王鞭責並用鐵鍊十字鎖項繞至背後鎖錮加繫約二三丈長繩拴於陳泳太文祿所住之書房內桌腳每遇掃地遞飯均帶繩出入嗣伊見其哭泣可憐私行解放十五年十二月十八日夜書房內被竊金茶託一個即在院內東廂房服役之馬興兒乘夜潛逃稟經惇親王飭拿未獲盧歡因伊屋內失物俱干重責時發愁歎經伊等向其勸解是月二十一日早盧歡於黎明時起身聲稱腹餓自赴西廂房用剩飯煮粥食下移時即嘔稱腹痛在炕滾轉吐瀉不止繼以吐血伊與德順見其病勢垂危即遣李旺將盧歡之兄盧二喚進園內囑令抬回醫治旋即身故嗣經李旺拾獲盧歡遺下搭連一個內有藥丸數粒似係毒鼠藥伊憶及房內舊有毒鼠藥檢査尙剩七包當即開視與盧歡襪內藥丸無異詢據更夫張德順告稱伊於盧歡食粥時曾見其置物碗中是以伊等均疑盧歡係服毒身死隔別訊據陳泳太文祿德順富安李旺等衆供如出一轍其爲失物懼責愁急輕生已可概見又如所控王府安設囚牢圈禁無辜一欵查前在惇親王寓園闌板房起

獲關禁之富安德善索呢歡馮三受霍隆武定柱雙柱穆齊賢等八名府第開板房起獲關禁之田沛霖陳泳升富呢雅罕興海董秉誠劉明杜奎等七名又經臣等訊出關禁多日甫經釋放之文玉一名訊據僉供惇親王於去年二月間在府內園內各設開板房一所門窗均用木板釘固伊等俱因得罪先後收入開板房每日給飯二次便洩皆在房內夜間並無燈燭並責令輪流擊柝支更伊等被禁自年餘至十餘日不等該王府並無另設水牢及木籠之事又如所控惇親王府中園中圈禁多人不准討假等情一欵查前在惇親王寓園府第起獲散禁之安善陳泳太劉泳順善明性善卽楊繼祥怡安張三登文祿王勛重史恒安王春年德順孫受增雙住張安太鍾祥祿善圖他布卽延受德海王咸郭隆阿高松林明通祥太許長受明玉長春尙安太達明阿文峻長安阿洪阿善亮受善安良長順愛興阿雅爾哈錢寬朱文善孟慎德得奎德倫八十七卽定受李春和宋福祿平安福劉受山靜受金得祿倭隆阿崔逢年田得玉郭明阿咸安卽祥文胡圖靈阿何長山安喜等五十八名又經臣等訊出散禁園內之受普趙長興張如瓶三名奏奉諭旨飭令該王府交出送案並傳到希

孟塔克清阿張三全安扎拉杭阿德隆等六名訊據僉供王府官員兵丁等因事被圈有罰該長班不准出府者有散禁府內東羣房園內東書房不准出院者有關禁府內西羣房園內西書房不准出屋者伊等均因得罪先後被禁府內園內各處每日畫押一次以便稽查不准告假回家亦不准家人看視伊等被禁自十餘年至十餘日不等委無非刑凌虐情弊以上各款疊經臣等逐一研訊均各堅供不移似無遁飾應即擬結查律載斷罪無正條援引他律比附加減定擬又例載下五旗包衣人經該王門上送部發遣者由部核准即咨送兵部轉發打牲烏喇又律載對質奏事詐不以實杖一百徒三年又子孫告祖父母父母者雖得實亦杖一百徒三年奴婢告家長罪同各等語此案李秋澄身充太監經惇親王派管府務自應安分守法乃違例吸食鴉片烟並令闔府官員兵丁等給伊站道請安復以面奉王諭爲詞將頭等護衛郭升阿等擅行責打又將郭隆阿尙安太私圈私放實屬恃寵縱恣任性妄爲未便僅照吸食鴉片烟不將販賣之人供出例擬以滿徒致滋輕縱李秋澄應革退八品首領太監從重比照下五旗包衣人經該王門上送部發遣由部核准即咨送兵部

轉發打牲烏喇例發往打牲烏喇給官員兵丁爲奴驍騎校拴住虛銜護軍校全福聽從惇親王主使代哈興阿寶文冒名引見律例內並無治罪專條惟該弁等於引見時口奏履歷假捏姓名即屬詐不以實亦應比律定擬拴住全福俱應革退職銜對照制奏事詐不以實杖一百徒三年律擬杖一百徒三年係迫於主命均應量減一等擬杖九十徒二年半仍照旗人犯徒本律折枷三十日六品虛銜巴克清阿聽從惇親王代護軍校周廣勳冒名引見旋即中止事屬未成惟究有不合巴克清阿周廣勳俱應革退職銜照不應重律杖八十全順即安保全祿即定保藏匿王府訊由惇親王留住不放其冒戴頂戴亦由惇親王濫行賞給惟以優伶下賤投托親藩究屬不安本分全順即安保全祿卽定保均應革去頂戴照不應重律杖八十時逢熟審拴住全福應俟秋涼補枷滿日鞭責發落巴克清阿等均減責發落全順係南府逐出之人本應勒令回籍全祿亦未便任其逗遛在京應交兵部將該二犯連伊家屬一併遞回原籍蘇州折責交地方官嚴加管束毋許潛行回京滋事穆齊賢於伊妻陳氏控告時業被關禁惟先期交給伊妻各款清單即屬授意控告現經訊明俱已得

實按律罪應擬徒惟業已被禁多日鞭責數百現在傷重未愈情殊可憫可否准其免罪之處出自天恩三等護衛哈興阿於控住代伊冒名引見訊據控住供明該護衛實不知情應即斥革免其傳質寶文現已在逃應俟緝獲另結悖親王綿愷將恭奉懿旨逐出之優伶復行藏匿府內賞予無節並令控住等冒名引見復冒領業已病故之訥楞額等俸銀又將由部庫領出官員俸銀擅行罰扣抵補私虧其府第寓園關禁多人業經逐名查獲至民人盧歡服毒自盡一節亦據鍾迎鸞等衆供僉同實屬咎有應得應請旨交宗人府嚴加議處仍恭候欽定至被禁之富安等八十二名現經訊明均因細故被禁無罪可科未便再行羈累臣等於訊供後即交各該管衙門分別保領用廣皇仁惟案結後若仍令回悖親王府當差誠恐各存疑畏別釀事端應請將包衣哈朗阿並其家屬及太監等撥入別府當差民人飭令回籍俾免失所其開板房二處請旨飭令拆毀倘此外仍有關禁之人並令查明一併釋放穆陳氏出名控告律應坐罪伊夫應與訊無不合之鍾迎鸞及無干之李旺等均毋庸議所有臣等會同審明定擬緣由理合恭摺具奏請旨道光十八年六月初六日

大學士軍機大臣臣穆彰阿

大學士軍機大臣臣潘士恩

都察院左都御史軍機大臣臣奎照

戶部左侍郎軍機大臣臣文慶

刑部尚書禮部尚書臣鄂瑱

署尚書禮部尚書臣祁瑱

左侍郎臣恩銘

右侍郎臣吳文鎔

右侍郎臣麟魁

右侍郎臣許乃普

右侍郎臣魁

右侍郎臣許

右侍郎臣

右侍郎

供單

太監王德恩供道光十二年正月不記日期惇親王福晉面奏皇太后稱府第
寓園現圈多人當奉諭旨派王德恩跟隨福晉到園將全順全祿逐放又派黃
德福隨同惇親王赴府將圈禁十餘人全行釋放旋奉諭旨復派王德恩即赴
府內查明曾否釋放王德恩到府時已未刻目覩惇親王將所圈之人放出王
德恩令伊等各具出府後不敢滋事甘結並告以儻日後再被惇親王誣入府
中准伊等向王德恩告知所供是實

太監黃德福供道光十二年正月不記日子惇親王福晉面奏皇太后說府第

寓園俱有圈禁的人當奉諭旨派黃德福進城查明釋放及到王府時約有未刻惇親王亦已到彼黃德福隨同至西邊轉角房內將所圈之人放出約有十數人不能記憶姓名正在釋放間王德恩亦由園內趕到眼同放出所供是實李秋澄係惇親王府八品太監年四十歲十六年派管闔府一切事務官員人等均稱李三大人每值該太監出入府第俱各站立道旁逢年遇節官員給伊單屈膝請安兵丁給伊雙屈膝請安有不站道請安者立即申斥並尋衅擺佈曾將護衛郭升阿太監劉明用鞭送責多下其餘被責者不可勝數該太監每遇責打官兵等均口稱奉該王示帖並將郭隆阿尙安太等私行關禁平日吸食鴉片烟有伊服役小太監龐眉等供歷歷如繪該太監復將龐眉帶至私宅服役馳車騁馬衣服華美闔府官員等均因該王深加信任畏其勢焰不敢控

告

全順本姓奚年二十三歲幼年隨伊祖奚大慶在南府唱戲七年逐出十年冬間經該王將伊由戲班內喚至園中並於次年春間將伊弟全祿一併喚進在園內抱厦房居住十二年正月間經總管太監王德恩太監黃德福奉諭旨令

該王將全順等二人放出當經該王令太監鍾迎鸞劉泳順將伊等送至伊戚
白姓家暫住旋即送入王府東書房撥給民人性善太監怡安等服侍令府中
人稱全順爲大爺全祿爲二爺其服侍人等均自稱奴才又賞給全順四品頂
戴全祿六品頂戴並在船板胡同代置房屋賞給衣服銀兩等物無數隔別訊
據鍾迎鸞劉泳順李秋澄等供俱相符

全祿係全順之弟年二十一歲與全順俱全

鍾迎鸞係太監年四十五歲在該王園內當差十五年八月間有撥在書房給
陳泳太等服侍之民人盧歡因事被該王鞭責並用鍊鎖項加繫長繩拴在桌
脚一切掃地遞飯等事可以帶繩出入十二月間該王搬進城內經鍾迎鸞將
盧歡解放適書房遺失金茶托一個並有馬興兒逃走未獲正在具報間盧歡
猝患肚痛吐瀉不止繼以吐血經鍾迎鸞見其垂斃當將其兄盧二喚至用門
板將其抬送回家旋即身故稟經該王賞銀十兩嗣經更夫李旺張得順查出
盧歡所遺裕褌內有紙包藥丸數粒似像毒鼠藥告知鍾迎鸞憶及該處西廂
房有伊散放毒鼠藥搜查尙剩七包每包計藥丸數十粒即向衆人詢問經張

得順聲稱盧歡於早起曾吃水飯見其置物飯中是以衆人均疑盧歡服毒身死等語

穆齊賢係包衣年三十八歲 霍隆武哈朗阿年二十歲 德善係包衣年三

十七歲 定住哈朗阿年三十三歲 索呢歡即成存哈朗阿年二十九歲

雙桂係包衣年二十三歲 馮三壽係太監年二十六歲 富安係包衣年二

十八歲

以上八名或因被圈脫逃或討求差使或私自留鬚及不用心學習字畫並告假省親等情均經鞭責關禁園內閘板房訊據供稱該王於去年二月間將從前圈人之書房西屋一間門窗俱用本板釘固窗間僅留一竅所有關禁人等均先行剝去衣服鞋襪僅留衫褲每日給飯二次便洩俱在屋內夜間不給燈火並令徹夜輪流支更

富呢雅罕哈朗阿年三十二歲 興海哈朗阿年二十二歲 陳泳升係壯丁

年二十七歲 劉明係太監年十六歲 董秉誠係太監年三十歲 田沛霖

係太監年三十六歲 杜奎係民人在府看守馬號年三十六歲

以上七名因在外閒游或因伊兄脫逃或私自省親及與人口角並代人傳信等情均經鞭責關禁府第闌板房訊據供稱該府闌板房亦係去年二月安設房內情形與園內闌板房無異

又性善等五十五名均因細故經該王散禁府內東西廂房等處不准告假出門

又文祿等十一名均因細故經該王散禁園內書房西廂房等處不准告假出門

上諭七

道光十八年六月初六日奉旨前因惇親王府第寓園囚禁多人當降旨飭令軍機大臣會同刑部審訊茲據會審具奏惇親王綿愷既違例囚禁多人復將優伶藏匿府內並令拴住等冒名引見又將部庫領出官員俸銀罰扣抵補私虧卑鄙謬妄怙過不悛實出情理之外綿愷著交宗人府嚴加議處太監李秋澄違禁吸食鴉片烟並令闔府官員兵丁等站道請安復將護衛郭升阿等擅

責又將郭隆阿尙安太私圈私放實屬目無法紀李秋澄著枷號兩個月滿日發往黑龍江給兵丁爲奴遇赦不赦優人全順全祿著交兵部連伊家屬一併遞回原籍蘇州斥責交地方官嚴加管束毋許潛行回京滋事至被禁之富安等八十二名現經訊明均因細故被禁不必再行羈累著交各該管衙門分別保領所有包衣哈喇阿並其家屬及太監人等均著各該管衙門妥議辦理民人飭令回籍以上各名俱不准再回該王府當差其閘板房二處卽著拆毀此外儻仍有關禁之人著該王迅即釋放毋許拘留餘依議該衙門知道欽此

上諭八

道光十八年六月初六日奉旨惇親王綿愷業經退出內庭行走所住圓明園寓園一所著卽交出該管內務府大臣查收欽此

宗人府摺二

宗人府宗令和碩肅親王臣敬敏等謹奏爲遵旨嚴議具奏請旨事道光十八

年六月初六日內閣奉旨前因惇親王府第寓園囚禁多人當降旨飭令軍機大臣會同刑部審訊茲據會審具奏惇親王綿愷既違例囚禁多人復將優伶藏匿府內並令拴住等冒名引見又將部庫領出官員俸銀罰扣抵補私虧卑鄙謬妄怙過不悛實出情理之外綿愷著宗人府嚴加議處等因欽此欽遵抄出到臣衙門臣等查和碩惇親王綿愷於府第寓園違例囚禁多人復將優伶藏匿並令拴住等冒名引見又將官員俸銀罰扣抵補私虧種種情節誠如聖諭卑鄙謬妄實出情理之外欽奉諭旨交臣衙門嚴議臣等查例載王公遇有罰俸案件係私事俱罰伊等王公俸係公事俱罰其職任俸等語今和碩惇親王綿愷所得私罪未便比照王公尋常私罪嚴議之案僅議罰其王俸臣等公同酌議請將和碩惇親王綿愷革去王爵所有臣等遵旨嚴議之處是否有當伏乞皇上訓示遵行爲此謹奏請旨道光十八年六月初八日

宗令和碩肅親王臣敬敏

左宗正和碩睿親王臣仁壽

右宗正和碩鄭親王臣烏爾恭阿

左宗人多羅貝勒臣綿德

右宗人固山貝子臣綿岫

上諭九

道光十八年六月初八日內閣奉上諭前因惇親王綿愷違例囚禁多人等欺降旨交宗人府嚴加議處茲據該衙門議以革去王爵實屬咎所應得姑從寬革去親王降為郡王並革去紅絨結頂金黃蟒袍以示懲儆欽此

惇郡王府被圈包衣兵役名單

領出惇郡王府被圈包衣人役花名

包衣德海佐領下

閑散趙希孟

係肅親王門上分撥

閑散壽善

係廂藍旗滿洲另檔由護軍分撥原名倭仁布

閑散李祿善

係廂藍旗蒙古另檔由養育兵分撥原名阿年保

閑散商安泰

係奉恩鎮國公永康門上分撥

閑散胡德奎

係民

閑散趙成興

係本府壯丁

閑散李安良

係奉恩鎮國公奕奎門上分撥

閑散李安善

係奉恩鎮國公

奕奎門上分撥

閑散扎拉杭阿

係正藍旗滿洲另檔由養育兵分撥

頭等護衛兼佐領德海

係正藍旗滿洲

另檔由護軍分撥

閑散巴克清阿

係廂藍旗滿洲另檔由原係保護軍奉部文斥革

包衣布彥佐領下

閑散郭隆阿係肅親王門上分撥

閑散陳雙貴係貝子祥端門上分撥

閑散愛興阿係廂藍旗滿洲另檔

由前鋒分撥 閑散高善明係廂藍旗滿洲另檔 馬甲伊克金布之子 二等護衛塔克清阿係正藍旗滿洲另檔

由護軍分撥 閑散達明阿係廂藍旗滿洲另檔 閑散陳永陞係本府壯丁 閑散李安喜

係民 閑散胡圖凌阿係廂藍旗滿洲另檔 原名塔豐阿 閑散德順係正藍旗滿洲另檔 由馬甲分

撥 閑散穆齊賢係廂藍旗滿洲另檔 由養育兵分撥

包衣愛隆阿管領下

閑散錢寬係肅親王門上分撥 閑散雅爾哈係廂藍旗滿洲另檔 閑散孫興海係廂藍旗蒙古

另檔由養育兵分撥 閑散富安係正藍旗滿洲另檔 閑散文祿係民 本府六品達朱

文喜係民 閑散拴住係正紅旗滿洲另檔 原係驍騎校奉部文革去職銜 閑散全福係廂藍旗

滿洲另檔由護軍分撥 閑散周廣勳係民 原係本府護軍校奉部文斥革

以上共三十一名

惇郡王府被圈滿洲官兵名單

領出惇郡王府被圈滿洲哈郎阿官員兵丁花名

忠順佐領下六品包衣達明通 親軍豁隆武 祥泰 弓匠善亮 額勒精

額佐領下親軍富呢雅漢 弓匠色凌阿 吉昌佐領下八品鑄匠達定住

親軍雙住 莫德禮佐領下親軍德倫 玉祥佐領下親軍倭隆額 興連佐

領下八品圈長德隆

以上共十一員名

上諭十

道光十八年六月十五日奉旨此次惇郡王府被圈官員兵丁業經釋放即行
按名裁撤毋庸另行撥補欽此

清乾隆朝福建督撫伍拉納浦霖等受賄被誅案

長麟
魁倫摺九

署閩浙總督臣覺羅長麟
署福建巡撫將軍臣魁倫
跪奏爲遵旨即速回奏事臣等於九月初二日欽奉
諭旨以玉德奏查詢商船據稱山東江南洋面並無盜匪又據吉慶奏搶劫官
米及琉球貨船盜首等已逃回閩洋飭諭臣等嚴密查拿以期必獲併以臣等
訊問伍拉納等供詞及審訊周經情節意存化大爲小屢經申飭何以未據覆
訊具奏復蒙恩誨不可存五日京兆之見輒思遷就完事自蹈重戾欽此仰見
皇上於訓斥諄切之中寓矜恤保全之意臣等感激戰慄無地自容查海洋盜
匪自臣等接署之後於五六七等月拿獲盜犯一百六十名均經先後審辦具
奏八月間浙洋盜匪陸續逃入閩洋經臣等督飭鎮將於南北兩洋竭力兜擒
除用炮轟翻盜船淹斃各盜匪之案因無犯證不敢具奏外又據鎮將等拿獲
各案洋盜八十餘名詎各盜犯因查拿緊急又俱竄入北洋及浙省温州黃巖
一帶洋面臣等當飭鎮將窮力跟追趕赴北洋並恐各犯因洋面不能存身棄
舟登岸分投藏匿節次嚴飭海口陸路各營汛一體留心認真搜捕復據陸路

報獲盜犯四十餘名內有盜犯張初郎一名係閩洋積年盜首商民均知其名
海洋羣盜多聽指揮於九月初一日撥兵護解來省是日商民環睹如山人人
稱快又盜犯連大進等二十一名不惟訊係浙江劫米重犯且卽係行劫琉球
國貨船正盜臣等現將巨盜張初郎及行劫浙米琉球貨船之連大進等連夜
審明辦理卽於此次附驛另摺具奏併因琉球國貢使及被劫之夷船事主現
在閩省夷館居住臣等於審定行刑之時先令委員將獲犯緣由備向該夷人
明白告訴併令委員帶同各夷人前赴法塲看視夷人等均仰蒙大皇帝高
厚天恩旣令地方官加倍賠贖旋卽獲犯正法共稱天朝法律嚴明欽服之心
形於詞色其已獲未解各犯現在催提臣等仍檄飭鎮將等實心實力各路搜
拿務期有盜必獲不任稍留餘孽併嚴飭留心躡探行劫浙米之盜首李發枝
蔡大等踪跡硃批「一」今獲否設法查拏以肅海洋而慰聖懷至臣等審訊周經供詞
實屬糊塗錯謬自恨自愧罔知所措除已將究出伍拉納等收受鹽規及抽卷
舞弊監斃多命各重情於八月二十五日由驛具奏外臣等連日復向周經設
法熬審併恐該犯堅執不吐現在查傳時常親隨伍拉納等之巡捕人役等及

平日怨恨伍拉納伊轍布之人逐名嚴訊從旁推鞫一得伍拉納與周經分肥實蹟務卽立時飛行入奏查伍拉納等在閩多年凡吏治營伍鹽務以及大小事件一切廢弛現雖竭力整頓尙恐不能速效改觀臣等皆受恩深重之人具有天良實恨伍拉納等之不暇更何肯於周經一案稍爲容隱臣等實不敢存化大爲小之心萌五日京兆之見自取重戾上負天恩再伊轍布奉文截回於浙江途次患病前經臣等附摺具奏茲據沿途州縣報稱伊轍布漸次痊癒緩程行走已入閩境現在尙未抵省合併陳明謹此遵旨覆奏伏乞皇上睿鑒謹奏乾隆六十年九月二十一日奉硃批仍屬空言無益另有旨欽此 九月
初七日

長麟片

謹奏臣長麟因浙江黃巖鎮員缺緊要新任總兵孫全謀屢經檄催未報起身當經臣將先行委員前赴黃巖暫署緣由於九月初二日恭摺專差具奏茲於初三日孫全謀由廈門馳抵省城臣等當將浙洋滋擾情形併現在緝捕機宜

與之詳細講論諄囑其力加整頓不可稍有懈弛孫全謀均能領會查該員於水師事務實在熟習其議論搜捕之法亦俱井井有條已於初四日由省起身前赴新任恐以海洋緊要上廛聖懷合併附陳謹奏乾隆六十年九月二十一日奉硃批覽欽此

長麟
魁倫 摺十

署閩浙總督臣覺羅長麟
署福建巡撫將軍臣魁倫
諭據魁倫奏查姚蔡前任汀漳道府時所屬龍溪武平寧化等縣內虧缺銀二萬餘兩經浦霖咨令分賠何以姚蔡並未據實奏明將姚蔡解任向其嚴切訊問伊前在道府任內所屬虧空如有通同舞弊之處即一面奏聞一面將伊革職歸案審訊倫無別項情弊俟定案後再降諭旨所有魁倫清字片並給與姚蔡閱看令其據實登答欽此又於七月二十二日欽奉上諭據姚蔡奏所賠銀兩係從前短買穀石各州縣拖欠變抵不敷之款於各上司名下攤賠所奏究係一面之詞殊不足信著將原摺發交長麟等詳細核辦欽此又八月初四日

欽奉上諭據姚棻奏順道抽盤各州縣倉庫多非實貯等語姚棻前任該省道府有年漳泉皆其所屬豈如許虧空皆姚棻離任以後之事乎前次不卽行奏明回護顯然已降旨將伊解任質審長麟等若不嚴切詰訊別經審出恐不能當此重戾欽此又八月十八日欽奉上諭據訊取姚棻登答摺片其所供前在汀漳任內於所屬虧空實無通同舞弊之處亦未可信長麟等現又提訊從前汀漳虧空各州縣自無難水落石出等因欽此伏惟臣等荷蒙委任屢奉諭旨訓誨諄諄何敢稍存瞻徇代人受過臣等當即弔取各衙門案卷詳細考核姚棻前任漳州府暨汀漳龍道係在乾隆五十年以前彼時各屬倉穀已多非實貯按册核稽姚棻任內各屬虧缺倉穀二十八萬二千餘石其虧缺庫銀並未清查經姚棻查明虧缺倉穀數目卽向各屬勒追穀價陸續買補倉穀二十二萬四千餘石尙有六萬餘石追價存庫未經買補檢查姚棻於本年六月在漳州途次自行檢舉摺內其所稱缺穀及買補數目均與案卷相符並無捏飾惟檢舉摺內僅奏倉穀虧缺其於庫項虧缺若干之處姚棻爲親臨上司自必知情何以併不檢舉覆奏其爲有心迴護情事顯然當向姚棻詰訊據稱我在府

道任內時所屬州縣庫項錢糧均係年清年欸委不知彼時已有虧空若要迴護倉庫虧空總是一樣既將倉項奏出已應獲罪又何必隱瞞庫項自取重戾等語臣等復詰以你說本年過漳州時尙不知從前已有虧缺庫項之事查你上年在廣西巡撫任內已經接見閩省咨文即行繳銀一萬餘兩若不知從前庫項已有虧缺何肯甘心認賠據稱在廣西接見閩省咨文係籠統咨追並未指明是倉是庫我因身係大員既奉咨追且事關倉庫若不早行完繳更必干連獲罪但我一面繳銀一面即咨詢閩省我名下所賠究竟是何欸項令其詳細咨覆有案可查我若知道庫項亦有虧短既將銀兩認賠又何必多此一番咨詢若說我是預爲狡飾地步我上年在廣西何能先知閩省今年有事卽先以咨詢爲掩飾之計且彼時不惟我不知庫項有虧即四十八年我離閩後五十一五十三等年經歷任督撫三次奏請清查虧空案內均奏稱倉項虧短並未奏及庫項這是有案可查不能狡賴如今查出彼時庫項亦已有虧自係各州縣瞞著上司私行挪掩姚棻止因奏銷時尙無短缺未及細查受其愚瞞等語臣等復詢以你前在廣西接到咨追文書既經備文查詢欸項閩省自必列

欵咨覆你今年六月過漳州時何尙僅稱倉項虧缺仍不將庫項檢舉豈非始終徇隱據稱我在廣西咨詢後卽調任貴州實未接獲閩省列欵咨覆回文前過漳州時卽向現任汀漳道史夢琦詢問據云現在尙未查明不能得有確數我於六月十九日到巡撫任當向書吏索看閩省咨覆原稿纔知道我任內應賠係武平縣穀價銀四百八兩零仍係倉項並非庫項又應賠寧化縣除穀價一千六百三十七兩外應賠庫銀僅止十一兩零我何必隱瞞且閩省列欵咨覆原稿內卽自稱此項係五十四年後查出可見我從前並不能知情又應賠龍溪縣知縣聶宗陽名下虧缺庫項一萬九千三百九十二兩零閩省咨覆原稿內亦自稱係五十四年始行查出係聶宗陽私立欠票交給後任議定陸續寄還聶宗陽病故此項欠票無人償還直至五十四年知縣錢致純纔將這項欠票稟出輾轉行查直到五十六年始經藩司查明詳辦我係五十年以前離任五十年以後之事如何能知這都有案可查並有知縣錢致純可問不但我不能容我隱瞞供畢去帽叩頭伏地悚慄跪稱姚棻身受重恩毫無報效併任內所屬倉庫均未能督辦整齊尙有何顏強辯惟有仰懇天恩從

嚴治罪等語臣等當即按照所供情節逐一查覈姚棻於上年接到咨追移文即有回文咨詢應賠款項確有文卷可憑其所稱六月內行抵漳州即查詢現任道員史夢琦因虧冊尙未查清不能指出確數姚棻到巡撫任後即向書吏調查列款咨覆原文始知從前庫項亦有虧短之處均屬實情史夢琦現在省城臣等細向查詢並將巡撫衙門書吏指名傳審均與姚棻所供無異併查明姚棻名下應賠銀兩委係五十四年始行查出閩省咨追文書係上年十月初四日咨廣西姚棻咨詢款項回文係本年閏二月初四日到閩閩省又於閏二月二十日咨覆貴州此等尋常文書自閩至黔總須兩月有餘且彼時貴州文報不通姚棻調任來閩係奏明由捷路行走並未經由驛路是其並未接到閩省列款回咨之處亦尙可信其所稱四十八五十一五十三等年三次清查亦但經奏查倉項而未奏及庫項所有各屬庫項虧缺均係五十四五等年陸續查出之處亦有卷冊可考臣等詳細核對前後情節悉與姚棻所稱相符但此不過係姚棻檢舉摺內尙無欺飾之明徵其與從前各屬員有無通同舞弊及或另有簞盞不飭之處必應嚴行推求跟究確實方成信讞查姚棻離閩已閱

十有餘年舊日屬員在閩無多惟有錢致純楊廷理徐夢麟現俱提至省城當即逐加嚴訊並諭以汝等皆係有罪之人若代姚棻欺瞞容隱更當罪上加罪據同供五十年以前汀漳所屬庫項虧空原屬有限州縣容易挪掩且恐說出獲罪即經上司盤詢亦必匿情不吐姚棻實不知情惟倉穀不能通挪遮飾當被姚棻查出詳定章程追價買補姚棻如有通同舞弊情事屬員有所挾制即斷不能勒追穀價彼時各屬措繳穀價已屬艱難再無餘力餽送應酬這是實情如有謊供願甘加罪等語臣等復提汀漳道書役人等隔別究訊俱稱書役等充當有年從前姚本官任內於買補倉穀一事常奉差赴各屬催查那時各州縣都抱怨姚本官過於嚴刻如有交通侵染及收受餽送情事難瞞書役等耳目今蒙嚴審姚本官實無其事不敢妄供等語再三嚴詰矢口不移臣等復採訪輿論亦無異詞是姚棻於所屬虧空實無通同舞弊之事亦屬可信但姚棻身受重恩於攤賠所屬虧缺銀兩雖經賠繳然於調任閩省時並不及早奏明直到奉到恩旨飭令檢舉始行奏出已據姚棻於檢舉摺內自請交部治罪應敬候諭旨遵行謹將臣等奉旨嚴切查訊緣由據實恭摺覆奏併繕供單敬

呈御覽伏祈皇上睿鑒謹奏乾隆六十年九月二十一日奉硃批該部嚴察議奏欽此 九月初七日

玉德摺

山東巡撫臣玉德跪奏爲奏聞事恭照九月初十日欽奉諭旨飭令沿途將伍拉納浦霖家屬攜帶行李賞重截留查明解京等因欽此當經臣飛行東西兩路並運河水路各府州縣嚴密稽察截留茲臣查驗各屬城工行抵臨邑縣途次接據沂州府知府歐煥舒稟報伍拉納家屬行李車輛於九月十二日行至東境郟城縣地方該府等當即截留將箱隻查點封固並訊據該管事家人呂三等供稱尙有行李車輛由王家營分路從江南宿遷縣入東省滕縣由西大路行走並有玉玩木器箱隻裝船由水路行走此時約在蘇揚一帶等語臣當卽飛飭藩司孫曰秉馳赴郟城縣帶同該府歐煥舒等將車輛所載賞財物件逐一查明再行嚴訊管事家人呂三等任所沿途有無隱匿寄頓不使稍有遺漏所有截留賞財物件詳細造冊遵旨委員解京其家人男婦押送該旂照例

辦理至由西大路行走車輛並水路船隻恐此時已入東境並即札飭兗沂曹道孫星衍會同運河道羅煥前往截留如一到境即行嚴密查辦恐尙在江南境內除一面飛咨江南督撫一體截留外所有截查辦理緣由理合恭摺具奏伏乞皇上睿鑒謹奏乾隆六十年九月二十日奉硃批覽欽此

廷寄

大學士公阿大學士伯和字寄署閩浙總督長署福建巡撫魁乾隆六十年九月初十日奉上諭昨伍拉納浦霖解到交軍機大臣等審訊所有得受鹽規及抽換案卷等款已據承認其罪業難末減但長泰縣薛林二姓械鬥之案如不過辦理遲延處分甚少錢受椿因何代該府縣懇求伍拉納浦霖抽換案卷伍拉納浦霖又因何肯擔此重大干係聽其抽換其中必有得受賄囑情事尙未據供出實情即各州縣虧空伍拉納浦霖係該省督撫若非平時與屬員串通分肥亦何以置之不辦俱不可不徹底跟究此時遽將伊二人寘諸重典則錢受椿等知質證無人更可飾詞卸罪再著傳諭長麟魁倫務即將漳州械鬥一

案該府縣如何賄求伍拉納浦霖錢受椿抽詳舞弊及各州縣虧空伍拉納等如何通同染指並定擬錢受椿等罪之處速行審明定擬具奏以便交軍機大臣等會核定擬勿再瞻徇遲延致干重咎將此由六百里加緊諭令知之仍卽由六百里覆奏欽此遵旨寄信前來

廷寄二

大學士公阿大學士伯和字寄署閩浙總督長署福建巡撫魁乾隆六十年九月十二日奉上諭伍拉納浦霖在督撫任內得受鹽規及抽詳銷案等款疊經降旨令長麟等嚴查確審迅速具奏矣但思長泰縣械鬥一案在府縣等妄拏報解冀圖邀功尙屬事之所有至錢受椿係好事見長之人於人犯解省後既經審非正兇即應據實稟明督撫詳揭請參伊亦可以見長討好何以轉爲之求抽案卷致案隔一年拖斃十命之多若非袒護屬員受賄交結何值擔此重大干係伍拉納浦霖於臬司稟請抽卷時自應一面據實參辦一面嚴飭另緝正兇方爲正辦朕必加之獎諭何以計不出此輒聽錢受椿所請卽將原卷發

還其故實不可解若謂無得受賄囑串通分肥情事夫誰信之至閩省各屬虧空爲數至二百餘萬伍拉納浦霖從前總未查明據實具奏若謂伍拉納等在任時於得收鹽規之外與各屬毫無需索沾染又何肯代爲隱瞞獨擔干係殊非情理著再傳諭長麟等提訊錢受椿於抽卷一事究竟如何聽受囑托得受賄賂伍拉納等如何輒允所請染指朋分之處逐一切實訊明毋任稍有狡展其通省虧空伍拉納等因何意存諱飾作何聽情受賄無難嚴訊各屬水落石出及此外各款有情節未能符合不實不盡之處俱著長麟等嚴審確查務得實在情節迅速一併據實定擬具奏毋得稍有瞻顧遲延致干重咎至伍拉納浦霖任所貲財已經降旨查抄即此時伊二人家屬業已起身平日所厚屬員及信用之家人等難保無代爲隱寄情事並著長麟等嚴密訪查毋任稍有透漏再閩省拏獲在浙劫奪官米之犯其盜首林發枝蔡大等二犯尙未弋獲已令長麟等實力督拏現在曾否就獲並著速奏將此由六百里諭令知之欽此遵旨寄信前來

長麟
魁倫 摺十一

署閩浙總督臣覺羅長麟 跪奏爲遵旨覆奏事本年九月十二日連接諭旨以
署福建巡撫將軍臣魁倫 臣等辦理浙江搶劫官米洋盜並參奏黃奠邦縱放刀炮出洋一案均未由驛
遞奏仰蒙傳旨申飭并蒙垂詢交審倉庫侵挪虧缺一案何以日久尙未審明
若別有難辦何不速行密奏又審訊周經情節屢經降旨嚴飭何以總未覆訊
具奏又因漳州臺灣米價尙未平減飭諭臣等設法調劑又飭諭臣等將黃奠
邦被參之處令哈當阿劉大懿將犯事緣由向其族屬明白曉諭方足以安輯
義民之心不至別生意外事故欽此臣等跪讀之下不勝惶恐伏查臣等於審
辦搶劫官米重案及參奏黃奠邦捏飾錯謬之處並未由驛遞奏實屬糊塗拘
泥仰蒙皇上僅予申飭慚懼之餘實深感激至倉庫虧缺一案臣等審辦遲延
實亦無可置辯惟閩省情形有不敢不實陳於聖主之前者查臣等署任之初
正值臺灣甫定之際彼時通省米價昂貴異常盜匪充塞於海洋搶劫頻聞於
道路民氣未寧官心惶怖若即將虧缺各員紛紛提省審訊不但地方州縣同
時無官猾吏奸民必致乘機滋事且五六月間閩省並無候補試用人員摘印

署事亦實無一人可委即省中諸事當廢弛已極之後雜亂紛歧竟屬茫無頭

緒

硃批此等情節何不奏聞

臣等焦切如焚轉不敢稍形詞色惟有諄飭虧缺各員安心辦

事若能撫綏斯民無誤地方必將奏懇聖恩赦其前罪是即以應行審辦之人誘其暫爲指臂之助嗣於七月間糧價漸平海洋陸路盜匪日就捕獲而商民得以乂安七月內分發候補道府始行先後來閩七月底八月初大挑試用知縣亦陸續到省臣等即於八月初間札委藩司田鳳儀暨候補道府帶同試用知縣分赴各府逐細清查一面先將現任之員押解來省一面摘印委署計自八月至今已據解到虧缺州縣二十五員臣等現在逐日審訊本擬先行分案奏結惟該州縣中多有一人經莅數任者此任雖已查清而距省較遠之彼任尙未查明具報約於九月底通省可以清查完竣押解到齊十月內可以陸續具奏臣等受恩深重急欲將虧缺一案趕辦完結以爲安心整飭地方之計閩省官方吏治營伍鹽務士氣民風無一可問至漳泉一帶犷悍尤甚稍寬則藝而生玩過嚴則激而生變臣等現在日夜盡心竭力尙恐辦理或有不周更何敢遷延觀望稍有懈弛取咎而上負聖慈至審訊周經一案初次欽奉嚴旨時

適臣長麟前赴海口捕盜

殊批是重耳

臣魁倫已經監臨入闈

殊批有何要緊

臣等於八月

二十一二等日趕緊回省料理出闈二次嚴旨亦已奉到臣等當即連夜審訊究出伍拉納等收受鹽規及於人命重案抽卷舞弊各重情卽於二十五日遵旨由六百里加緊覆奏惟伊轍布在浙江患病及入閩境轉瘧爲痢不能起身前進經臣等飭委臬司李殿圖迎赴前途追訊確供茲據臬司李殿圖稟稱於九月初六日前至浦城縣相遇伊轍布向其再三嚴切跟究伊轍布堅供如有與周經通同分肥情事當交代時我已經代爲彌補齊全就不該仍向周經名下追出玉器房地各契發交首府變價歸庫自取敗露且此事係我被審時自己供出我若有分肥情弊何肯將遮蓋已完之事復行說出以致周經被審因此治罪此時周經自必恨我如何還肯替我隱瞞總是我辜負天恩福盡災生只求治罪實沒有與周經通同分肥情事等語復提周經反覆究審該犯堅執前供不移伏查此案臣等屢蒙訓飭尙不能究出通同分肥情弊實在自愧自恨悚惶戰慄不勝迫切焦急之至伊轍布現在延醫調治容俟痊愈到省臣等親訊另奏至臺灣米價較前雖減而漳州則又致加增且漳泉一帶近日頗有

災衆臣現在另摺請旨妥爲辦理務期地方寧謐不致上塵聖慈再黃奠邦被
參一案仰蒙皇上垂念臺灣義民恐致別生疑畏查黃奠邦行爲尙屬平常鄉
鄰舉皆側目被參後道路相傳人人稱快不至別生意外臣等已恭錄諭旨飛
行哈當阿劉大諤向其族屬將被參緣由明白曉諭亦可不致上煩聖廬謹此
遵旨恭摺覆奏伏乞皇上睿鑒謹奏乾隆六十年十月初二日奉硃批卽有旨
欽此 九月十五日

廷寄三

大學士公阿大學士伯和字寄署閩浙總督長署福建巡撫魁乾隆六十年九
月二十一日奉上諭長麟等覆奏緝拿洋盜及嚴訊周經一摺仍屬空言無益
已於摺內批示矣伍拉納浦霖在督撫任內於械鬪斃命重案輒袒庇屬員抽
匿原卷於通省虧空則代爲隱瞞擔承且於藩司放賑時以銀易錢將多出餘
銀任聽藩司代周經墊補庫項而周經以微末庫吏伍拉納委心任用種種欺
飾弊混若非平日聽受囑托扶同舞弊分肥何肯代人擔此重大干係節經降

旨指示駁詰至爲詳盡長麟等自應遵照提集案證并遍爲察訪無難水落石出迅速覆奏乃本日所奏並未切實嚴問仍屬虛詞豈此等敷衍之摺便可塞責回護前非耶著再傳諭該署督等遵照疊降諭旨迅即逐款審明據實速奏毋得再有支飾自干咎戾至奏到拏獲盜首審明辦理一摺已另降諭旨將守備田藍玉知縣馮國柄加恩獎擢矣其案內逸盜林發枝蔡大等係行劫官米盜首情罪重大尤當嚴飭所屬一體留心嚴緝務獲毋致要犯稽誅將此諭六百里加緊令其速問廻奏欽此遵旨寄信前來

蘇凌阿
費淳摺

暫署兩江總督臣蘇凌阿
江蘇巡撫臣費淳
跪奏爲截留伍拉納賞重船二隻查明物件訊無侵
隱藏匿情弊恭摺奏聞事乾隆六十年九月十四日臣蘇凌阿在上海地方承
准大學士公阿大學士伯和字寄奉上諭長麟等奏查出伍拉納浦霖有得受
鹽務銀兩等事殊出情理之外現在伍拉納浦霖業已押解進京所有伊等家
屬及行李賞重諒已陸續起程自應沿途截留浦霖籍隸浙江其在籍賞財等

物自應一併嚴密查抄著傳諭直隸山東江蘇等省各督撫即行飭屬將伍拉納浦霖沿途經過地方如遇有伊等家屬攜帶貨重過境即行截留查明解京並着吉慶即將浦霖原籍家財詳細查封毋得稍有疎漏倘伍拉納浦霖家屬現在尙留閩省未經起身即着長麟等就近查抄毋任隱匿寄頓致干咎戾欽此查伍拉納家屬已於九月十三日護送出境交與山東省接護北上第恐另有貨重續行到境臣蘇凌阿即飛飭沿途各府州縣慎密偵探一面知會臣費淳就近督辦在案茲於九月十九日據蘇州府知府李廷敬稟稱探有伍拉納續到貨重船二隻行抵蘇境現在截留等情臣費淳立即率同司道親詣該船查有伍拉納長隨陳四存王福二名並有閩省差弁周得榮羅肇煌龔三捷等三名在船訊係署福建撫臣魁倫恐陳四存等沿途侵隱貨重因派該弁等押送等語臣即督同司道各官將該二船逐一查抄計抄出元絲銀五百五十兩及玉器銅磁紬緞皮衣等物裝貯箱籠共一百八十三號並有行李賬簿一本逐號查對內惟缺少銅盆帽盒二件餘俱相符隨訊據陳四存王福供稱本年七月初伊主伍拉納在閩起身時派下這些箱籠登有號簿交伊等管押進京

經署巡撫魁倫差官押送於七月初九日自福建起程其餘行李貨重俱係伍拉納家眷攜帶隨後起程伊等船隻行至延平府地方過灘撞破換船裝載遺失銅盆帽盒報明該處有案因雇換船隻耽延是以伍拉納眷屬先已攢過前途伊等先後領過盤費銀九百兩除用去外尙存元絲銀五百五十兩並無侵隱藏匿情弊復詰伍拉納在閩有無遺留物件此外有無另起行走船隻據供伊等自閩起身係在伍拉納家眷起身之前其家眷起身時有無遺留物件及有無另起船隻伊等實不知情嚴詰不移並訊據閩省押送委弁周得榮等供亦無異除將陳四存王福委員解部訊辦抄出物件賬簿分別解交內務府崇文門查收一面飛咨山東撫臣將伍拉納家眷截留查抄並飭沿途查明有無另起船隻嚴密辦理併咨會閩省飭查有無遺留物件一體查抄外至閩省差弁周得榮等三名奉差押送貨重今既截留查抄應由蘇省委員解京且物件數目並無短缺自應飭令回閩當差所有臣等截留伍拉納貨重船二隻訊無侵隱藏匿緣由理合恭摺由驛具奏並繕供單及物件清單恭呈御覽伏乞皇上睿鑒謹奏乾隆六十年十月初三日奉硃批知道了欽此

九月二十二

日

供單

據陳四存王福同供小的們都是大興縣人跟隨伍總督的本年七月初間伍總督在福建起身時派下這些物件着小的們管押進京把物件查點開了細賬又奉魁署撫差外委周得榮們押送七月初九日從福建起身那時還剩下些物件都是伍總督家眷攜帶隨後起程的因小的們船隻在延平府地方過灘撞破另行雇船裝載遺失銅盆帽盒兩件報明地方官有案因換船耽擱故此家眷先趕在頭裏了小的們船隻纔到蘇州就被盤獲在船物件都已抄出現有帳簿可查並沒絲毫隱匿小的們先後領過盤費銀九百兩除用去外尙存元絲銀五百五十兩亦蒙查出至伍總督家眷在後起身他們在福建有無遺留物件及有無另派船隻在後行走小的們實不知道是實

供單

據外委周得榮羅肇煌龔三捷同供本年七月初間伍總督緣事進京隨後陳四存王福管押這些物件起身帶有賬簿那時魁署撫因恐陳四存等中途侵

隱物件又派外委們押送同行七月初九日從福建起程伍總督的家眷是隨後起身的因這起船隻在延平府地方過灘撞破換船耽擱故此家眷先趕在頭裏了船內所裝物件均查抄並沒絲毫隱匿現有賬簿可查是實

清單

謹將截留伍拉納賞重船二隻查抄物件開具清單恭呈御覽

計開

市平市色銀五百五十兩 嵌玉如意一百一十二枝 翡翠爐瓶三事一分
碧玉爐瓶三事一分 玉爐瓶三事二分 碧玉盤一對 碧玉花瓶一件
玉梅花洗一件 玉太平有象一盒 玉靈獸合錦一件 玉提梁卣一件
玉瓶二件 碧玉碗一對 玉盞碗一對 玉佛手一件 玉暖手一盒九
件 碧玉鼻烟壺一盒九件 玉掛磬一件 玉吉慶一件 碧玉白玉雙桃
杯二件 玉筆一枝 玉小插牌一對 玉盃十二個 玉小雙魚洗一件
玉吉慶插牌合錦一盒 玉小瓶石花囊合錦一盒 碧玉匱小玉洗合錦一
匣 玉蟬一件 玉水池一件 玉圖書十二方一匣 雲南玉盞碗一個

銅爐鼎瓶洗共十一件 舊磁瓶洗罇盤共十五件 洋漆盒五個一匣 雕漆盒共八十六個 水晶鼻烟壺九個一匣 芙蓉水晶扳指二匣 琥珀獅一件 雄黃如意二枝 雄黃山一件 檀香如意一枝 嵌料石如意九枝 元狐十張 洋灰黑羊皮共四百九十四張 貂尾貂狄狐腿滑子鴨頭皮統三十件 蘇繡蟒袍十件 仙鶴補服二副 綢綾紗羅錦緞哆呢羽毛共五百六十七件 洋金線八匣 皮衣二十二件 棉夾單紗衣四百零七件 字畫燈毬雜物共九百二十六件 銅錫等項器具共四百一十七件

汪志伊摺

浙江布政使臣汪志伊跪奏爲查抄浦霖原籍貲財並究出隱匿寄頓等項恭摺由驛奏聞仰祈聖鑒事本年九月十九日申刻接到撫臣吉慶六百里密札欽奉上諭伍拉納浦霖家屬及行李貲重諒已陸續起程自應沿途截留浦霖在籍貲財等物俱應一併嚴密查抄毋得稍有疎漏等因欽此撫臣吉慶因在溫台一帶捕緝洋匪難以分身飭臣帶同杭州府鳴鐸速赴浦霖原籍嚴密查

抄開列清單徑行具奏等因臣當查伍拉納家屬行李於八月十五日已出浙境無憑截留隨帶同杭州府知府鳴鐸馳赴嘉善縣城督同該縣知縣岱毓前赴浦霖家內嚴密查封訊據浦霖次子生員浦焯供稱今年五月內生父浦霖欽奉諭旨離任生兄浦焄跟隨進京生員及弟浦煦均隨同母親胡氏帶領家屬於十一日自福建起身至六月初八日到家所有行李賞財全行帶回係母親經管止剩粗重家伙食物等項難以攜帶交閩縣稅行陳長元由海運送乍浦並沒另派家人管押至今尙未運到等語隨呈出田房契據一百八十六紙臣等查得現在住房兩所相連又本城及隣縣各處房屋七所共計契載價銀六千兩價錢四千一百九十二千文田二千七百畝零共計契載價銀六千七百十三兩零價錢三萬六千三千八百零復抄得現存元寶及雜色銀十四萬五千七十九兩零洋錢四千三百九十九圓金錠金器共六百九十六兩零錢七千六百九十餘千玉器大小二百七十三件計重二千四百九十兩三鑲玉如意大小共一百五十六柄朝珠一百零八盤銅磁器一百二十一件至紬緞皮張首飾衣服書籍字畫及動用一切器具零星雜物均逐細查抄列入清單

以上係查封浦霖家中現存之財產也臣伏思浦霖既經閩省查有得受鹽務銀兩等事其平日居官已可概見家產貲財斷不止有此數且自五月間革任以來爲時已久應亦料及抄家必有隱匿寄頓情弊當提朝夕伺候胡氏之僕婦使女及家人長隨人等連日隔別嚴審追究始據僕婦老王氏供有銀兩埋藏連子房內隨創出大缸五隻共銀十萬兩又據范氏供有銀兩埋藏西院花臺內及屋後小院地中隨創出油缸六隻共銀一萬三千三百兩又據陳于氏供有銀兩藏在後院夾牆枯井內當即起出銀一萬六百兩洋錢七千四百圓又據家人張阿寧供有銀五千兩洋錢二千圓寄頓伊家埋藏竈下又據家人劉文興王文新同供有朝珠十五掛金如意三枝銀四百兩寄在已故長隨之妻朱王氏家內俱經委員如數起獲又據家人陸陞供本年七月內胡氏命伊出名立契買田五十畝二分價錢八百三十六千零又供出胡氏轉托女婿錢洪緒之老僕盛忠在嘉秀二縣地方卽假錢姓出名立契買田三百十八畝零共計價銀一千八百八十二兩價錢四千三百六十九千零隨提盛忠攜帶契紙到案質訊屬實又據浦霖親戚生員駱侶梅自首呈出田契九紙計田一百

五十七畝零價錢二千千文供係浦霖之妻胡氏於本年六月間口稱此田坐落華亭縣地方將契紙交生收藏今聞嚴查是以呈出等語以上係追出浦霖家中隱匿並寄頓之財物也通計抄出元寶洋錢雜色銀共二十八萬四千三百一十四兩零金錠及金器共七百八十五兩零錢七千六百九十餘千文房屋九所田地三千二百二十六畝零共計價銀一萬四千五百九十五兩零價錢四萬七千四百六十五千零其餘朝珠衣服玉器及一切雜物應請另行估計臣恐此外尙有不實不盡將各犯反覆究詰提同浦煌等嚴加推鞠據供所有前項隱寄財產實因生父拿解進京母親慮及抄家日後無以過活故假托錢陸兩姓出名買田三百餘畝並將銀物隱匿寄頓今蒙嚴訊之下家人僕婦已據實供出此外實沒另有隱寄財物只求詳察餘犯亦皆堅供如前臣現在大張曉諭浦霖親戚隣里如尙有隱寄等物令其自首免罪仍一面嚴加密訪斷不敢稍有疎漏自取咎戾除詳請移咨江蘇撫臣轉飭地方官將浦霖置買華亭縣地畝及常熟房屋變價入官並委員赴乍浦俟閩省稅行運到浦霖交帶物件一體查封仍詳請移咨福建撫臣如前項物件尙未開行即就近截留

估變外所有現在查抄浦霖家貲緣由理合由驛馳奏並開具清單備繕供摺
恭呈御覽伏乞皇上睿鑒謹奏乾隆六十年十月初七日奉硃批大奇已有旨
欽此 九月二十九日

供單

據浦焯供生員年二十八歲父親浦霖母親胡氏弟兄三人大哥浦焯候補州
同現隨父親進京生員行二三弟浦煦捐納監生姪子浦壇考取入學今年五
月初二日生員父親解任後生員們俱隨母親帶了家屬及一切行李於十一
日自福建起身到六月初八日回家所有任所帶回一切貲財及家裡產業都
是母親經管尙有粗重傢伙碗盞食物等項內地脚費過重難以携帶交閩縣
陳長元稅行由海運送乍浦交卸並沒派人管押現尙未到今蒙查抄所有在
家田房契紙已經儘數呈出茲復蒙連日審究僕婦家人們業將隱寄財物供
出實緣夏間母親聞知復奉諭旨將父親拿問恐怕抄家日後難以過度因想
舊買華亭縣田一百五十七畝零價錢二千串係在隔省可以隱匿母親就喚
親戚駱侶梅來家商定把契紙九張交與駱侶梅帶到他家收藏又將銀五千

兩交與妹夫錢洪緒的老家人盛忠換些錢文買得坐落嘉興縣田一百七十八畝二分秀水縣田一百四十畝零契上就假寫在錢姓名下併倒填正二三四等月分共算用銀五千一百三十二兩除付過外又找銀一百三十二兩契紙十一張即交給盛忠收藏七月裏又叫在外居住的長隨陸陞出名在嘉善本縣買得田四契計田五十畝二分共價錢八百三十六千七百五十文又叫長隨劉文興王文新兩人拿了朝珠十五串金如意三枝銀四百兩寄與已故家人朱相之妻王氏家內收藏又叫家人張榮陸續運出銀五千兩洋錢二千塊藏在他家後來母親恐在外寄頓耳目就吩咐在家裏掘坑埋藏先後在於花臺下及屋後小院地內兩處共埋銀一萬三千餘兩又在夾牆枯井內藏放銀一萬六百兩洋錢七千四百圓至連子房地內埋銀十萬兩係五十五年八月間藏的總是希圖留存過活如今已蒙一一追出此外實在別無隱匿寄頓物件如再查出願甘從重治罪求詳情

據僕婦老王氏供聞得五十五年上半年上主母胡氏在連子房內埋藏銀缸五隻不知是多少銀兩求創起就明白了

據僕婦范氏供主母又在花臺內及屋後小院地內埋有銀兩是實

據僕婦陳于氏供主母在後院夾牆枯井內藏有銀錢別的事不知道

據家人張阿寧供張榮是小的父親現在跟主人進京去了今年七月間父親陸續拿回銀五千兩洋錢二千圓說是主母胡氏交付寄頓的父親將銀錢俱埋在竈下今蒙審究不敢隱匿此外再無寄頓是實

據劉文興王文新同供今年八月間主母胡氏因主人解京恐怕抄家將朝珠十五串金如意三枝銀子四百兩叫小的們寄在已故長隨朱相之妻王氏家內收藏今蒙嚴審不敢隱匿小的們再沒寄頓別的物件求詳察

據朱王氏供小婦人故夫朱相曾在浦主人家充當長隨今年八月內劉文興王文新拿來朝珠一包計十五串金如意三枝銀子四百兩寄在小婦人家內今蒙差起已經呈出求開恩

據陸陞供今年七月間主母因家主解京恐怕抄家將來不能過活叫小的出名置買田產以爲日後家口過活小的買得嘉善縣田五十畝二分共價錢八百三十六千七百五十文田契都是假寫在小的陸處爲業收在小的家內又

主母叫他女婿錢洪緒的家人盛忠置買嘉秀二縣田三百十八畝零契上亦係假寫錢姓爲業卽交盛忠收藏小的因迫於主母之命隱寄田產只求開恩據盛忠供小的是錢洪緒的家人錢洪緒贅在浦家爲婿今年六月間浦主母恐怕抄家後來沒有飯吃有銀五千兩叫小的換些錢文買得坐落嘉興縣田一百七十八畝二分秀水縣田一百四十畝零契上就假寫在錢姓名下併倒填正二三四等月分共計用銀五千一百三十二兩除付過外又找給銀一百三十二兩所有契紙十一張小的收藏不敢投稅今蒙飭差弔契是以呈出求開恩

據駱侶梅供生員與浦霖是親戚今年六月間浦霖之妻胡氏向生員告知他丈夫奉旨拿問恐怕抄家有舊買江蘇華亭縣田一百五十七畝零價錢二千串遠在隔省是查不到的再三央懇生員收藏契紙生員因是親戚情有難却一時糊塗將田契九紙領回收藏的如今聞得嚴追寄頓不敢始終隱瞞致干重罪是以呈首出來的求開釋

清單

謹將查抄浦霖原籍貲財及究出隱寄等項財產開具清單恭呈御覽

計開

田房項下 住房兩所相連又置房屋七所共計契載價銀六千兩價錢四千

二百二十千文 田三千二百二十六畝四分七厘共計契載價銀八千五百

九十五兩九錢價錢四萬三千二百四十五千四百六十五文

金珠首飾銀錢項下 金錠金葉共重五百二十六兩六錢 金如意首飾四

十三件計重二百五十八兩九錢九分 銀二十八萬四千三百一十四兩五

錢八分內 元寶五萬一千二百兩 紋銀一十九萬三千四十九兩八錢

鹽疋銀二萬七千四百兩 元絲銀二千七百二十九兩五錢 洋錢一萬三

千七百九十九圓重九千九百三十五兩二錢八分 銀首飾六百一十三件

計重六百三十兩 珠二千七十四粒計重七兩九錢二分 錢七千六百九

十八千文

朝珠玉器珊瑚寶石銅磁項下 珊瑚朝珠二盤 拼珊瑚朝珠七盤內一盤

破損 碧璽朝珠七盤內碧璽根二盤 密蠟朝珠三十八盤內九盤破損

綠晶紫晶水晶金珀孔雀石朝珠五盤 雲南玉朝珠九盤內一盤背雲破損

綠松石催生石紫綠洋料朝珠二十六盤 白瑪瑙琥珀沉香朝珠六盤

木子象牙椰子新會香朝珠十四盤 瑪瑙洋料各色小朝珠九盤 珊瑚

綠晶紫料椰子雄精手串十八掛 三鑲玉如意大小共一百五十七柄 白

玉器四十四件重八百五十三兩九錢 青玉器四十九件重一千六十九兩

三錢 碧玉器十二件重三百六十八兩一錢 零細玉器一百六十七件重

一百八十四兩 帽頂五個內拼珊瑚一個珊瑚麪四個 珊瑚七小枝計重

二兩八錢 珊瑚小盆景二枝 碧璽大小二十八塊重十二兩四錢一分

零碎小寶石二百二十五粒重三兩一錢 銅器七十一件 磁器五十件

衣服綢緞紗羅皮張項下 朝衣共十三件 莽袍共四十六件 各色男女

大小皮衣共一百七十三件 貂皮貂腿貂尾元狐海龍烏雲豹水獺灰鼠羊

皮兔皮等項袍掛統共五十四件 元狐海龍水獺灰鼠羊皮兔皮共三千一

百一十四張 各色男女大小綿衣共一百十八件 各色男女大小夾衣共

三百一十二件 各色男女大小單衣共一百三十二件 各色男女大小紗

衣共三百一十七件 各色綢緞五百四十七疋衣料三百八十件 各色紗料四百八十五疋 羽呢嗶嘰噲漳絨等項共四百九十一件 洋金線五十縮 棉布夏布共一百四十疋 各色皮綿夾單女裙共一百九十三條 各色綢布被褥帳毯共二十九件

帽靴桌圍椅披鋪墊項下 各種皮帽二十頂緯帽八頂 靴二十對 桌圍椅披鋪墊共二百二十一件

書籍字畫圖章筆硯項下 各項書籍共一百三十七種不全 各項時人字

畫共三百五十一幅 石質圖章共二十一件 筆一百四十枝 墨一十二

包 硯六十方 五色箋紙二箱

鐘表水晶玻璃漆器項下 自鳴鐘表大小共二十八件 水晶筆架鼻烟壺

扳指等項共一百五十四件 玻璃圍屏掛屏掛鏡燈片轎窗等項共二百三

十三件 雕漆洋漆翻黃竹等項器皿共一百四十件

海味食米茶葉家具項下 燕窩十六匣重八觔 海參一箱重二十觔 茶

葉二十瓶 食米三百二十石 木器二百八十二件 轎二乘 銅器共重

二百三十七觔八兩 錫器共重七百九十五觔十二兩 家用磁器碗盞共

二千七百六十二件 鐵食鍋五隻計重十八觔

僕婢項下 家人婢女共七名口

以上各項現將金銀珠玉銅磁及細軟物件造具細冊派員解京其餘田房及

粗重物件確估造報合併聲明

... 共重三百五十一觔... 錫器共重七百九十五觔十二兩... 鐵食鍋五隻計重十八觔... 僕婢項下 家人婢女共七名口... 以上各項現將金銀珠玉銅磁及細軟物件造具細冊派員解京其餘田房及粗重物件確估造報合併聲明

清道光朝關稅案

八口達三片

再查向來淮關稅課以黃河豆載爲大宗上年五月十二日新季開徵以後豫省儀工尙未合龍宿遷一帶黃水斷流西河豆船不能運載來關稅課日形短絀截至十二月初八日儀工合龍計日半載有餘已少收銀十萬八千六百餘兩而時值隆冬冰凌未解船隻不能通行迨至本年正月下旬西河豆船始見陸續抵關奴才方思設法招徠稍冀以盈補絀乃上游徐邳一帶去歲收成歉薄小民口食維艱所存雜糧豆貨就近接濟民食赴南銷售分運無多現距五月十一日錢糧報滿爲期不過一月察看情形斷難補苴足額奴才內府世僕知識庸愚仰蒙天恩畀以錢糧重任乃前因黃流未通徵收短絀而合龍之後又未能趕補足額撫躬惶悚寢食難安除俟季滿結數再行恭摺奏報懇請着賠交議外所有虧短實在情形并奴才焦急悚愧下忱合肅附片陳奏伏乞皇上慈鑒謹奏道光元年四月二十三日奉硃批覽欽此

福森摺

奴才福森跪奏爲恭報征收關稅錢糧統計正額盈餘各數目儘收儘解仰祈
聖鑒事竊關稅一年期滿例將征收錢糧數目恭摺奏報天津關現屆期滿前
鹽政常顯任內自嘉慶二十五年三月十八日止共收稅科銀七萬三百二十
五兩六錢六分奴才自嘉慶二十五年十二月十九日到任接征起至道光元
年三月十七日止共收稅科銀一萬三千一百七十六兩九錢三分三厘兩任
合計一年期滿通共征收稅科銀八萬三千五百二兩五錢九分三厘內應解
戶部正額銀四萬四百六十四兩銅斤水脚銀七千六百九十二兩三錢一分
三厘又應解部科飯銀並照例支銷各項經費等銀一萬四千六十七兩一錢
七分實收盈餘銀二萬一千二百七十九兩一錢一分嘉慶四年欽奉恩旨減
定盈餘二萬兩之外多收銀一千二百七十九兩一錢一分除報明戶部儘收
儘解並另疏具題外理合恭摺奏報伏乞皇上聖鑒謹奏道光元年四月二十
八日奉硃批戶部知道欽此 四月二十六日

成剛摺

管理殺虎口稅務宗人府理事官奴才宗室成剛跪奏爲請旨仰祈聖鑒事竊奴才於嘉慶二十五年四月仰蒙天恩差管殺虎口稅務於是年四月二十二日接任至道光元年四月二十一日止一年期滿共徵收正額盈餘銀四萬五千九百二十九兩一錢二分七厘伏查前任監督祥鑽自嘉慶二十四年六月二十二日起至二十五年四月二十一日止奴才成剛於四月二十二日接管起至六月二十一日二任合計一年其應解應銷並庫存盈餘銀兩奴才於二十五年七月十三日照例具題並造冊呈送戶部查核在案仍自嘉慶二十五年六月二十二日起至本年四月二十一日止計十個月共徵收稅銀三萬五千九百八十三兩一錢六分七厘奴才遵照部劄移交接任監督禮部郎中薩迎阿續辦其一切解交應銷欸項由現任監督薩迎阿扣計一年再行分晰具題報部奴才謹將盈餘銀一萬七千八百八十六兩三錢一分三厘竪解到京是否遵照前題仍解內務府交納之處伏候皇上訓示遵行謹奏請旨道光元年五月初十日

查嘉慶二十四年殺虎口監督福克精額所得盈餘銀一萬七千八百六十三兩零奉旨交內務府一萬六千兩其餘銀一千八百六十三兩零賞給福克精額欽此嘉慶二十五年殺虎口監督祥鑽所得盈餘銀一萬七千八百七十二兩零奉旨交內務府一萬六千兩其餘銀一千八百七十二兩零賞給祥鑽欽此今殺虎口監督成剛任內盈餘銀一萬七千八百八十六兩零較福克精額任內多收銀二十三兩零較祥鑽多收銀十四兩零應交內務府若干賞給成剛若干之處伏候欽定謹奏道光元年五月初十日奉旨知道了這所得盈餘銀著交內務府一萬六千兩其餘銀一千八百八十六兩零著賞給成剛欽此

惠顯摺

管理鳳陽關稅務盧鳳道奴才惠顯跪奏爲關稅一年期滿徵收正盈錢糧數目據實奏明仰祈聖鑒事竊照鳳陽關稅課每年正額九萬一百五十九兩六

錢又於嘉慶九年七月內承准戶部劄知籌議關稅盈餘案內奏奉欽定盈餘銀一萬七千兩每年應徵正額盈餘銀十萬七千一百五十九兩六錢今鳳陽關稅務奴才自嘉慶二十五年四月十五日接徵起扣至道光元年四月十四日一年期滿共收銀十一萬五十三兩六錢計溢餘銀二千八百九十四兩照例於起解時將額支鳳陽府鳳陽縣臨淮鄉三學廩餼并支給經費各欸呈請撫臣查核具題并造冊報部外所有一年徵收錢糧總數理合據實奏明伏乞皇上聖鑒謹奏道光元年五月二十一日奉硃批戶部知道欽此 五月初

八日

惠顯摺二

管理鳳陽關稅務廬鳳道奴才惠顯跪奏爲奏聞事竊照鳳陽關監督前因廬鳳道兼管已有道任養廉銀兩足敷公用是以將關任養廉銀六千兩辦公銀六千兩解交造辦處充公嗣於乾隆三十三年閏二月間前監督卓爾岱具奏交銀摺內欽奉硃批嗣後於關任養廉內每年賞汝一千兩即後任亦照此辦

理欽此欽遵在案茲嘉慶二十五年四月十五日起扣至道光元年四月十四日一年稅務期滿奴才謹遵恩旨支領關任養廉銀一千兩其餘養廉銀五千兩辦公銀六千兩二共一萬一千兩應解造辦處交納再鳳陽大關徵收稅銀每兩有節省歸公銀七分並裁革傾銷火工飯食銀七分歷經奏明解交造辦處充公在案今嘉慶二十五年四月十五日起一年稅務期滿共徵收歸公銀五千五百八十八兩九分六厘傾銷銀五千五百八十八兩九分六厘又徵收關稅一年積存平餘鋪餘銀三千七百八十二兩九錢八分三厘向爲解部平飯及添補各口經費等因循例動支銀三千六百九十六兩九分九厘仍存平鋪餘銀八十六兩八錢八分四厘又關稅內尙有充公銀一厘爲添補平飯及一切辦公之用樽節支銷計存銀十一兩七錢八分八厘以上五共共銀二萬二千二百七十四兩八錢六分三厘俟委員起解正稅時一併解交造辦處兌收外理合恭摺奏明並繕清單恭呈御覽伏乞皇上聖鑒謹奏道光元年五月二十一日奉硃批該處知道欽此 五月初八日

今將嘉慶二十五年四月十五日起扣至道光元年四月十四日一年期滿鳳陽關解交造辦處各項銀兩數目

計開

養廉辦公銀一萬一千兩

歸公銀五千五百八十八兩九分六厘

傾銷銀五千五百八十八兩九分六厘

平餘錢餘銀八十六兩八錢八分四厘

充公餘存銀十一兩七錢八分七厘

五共銀二萬二千二百七十四兩八錢六分三厘

硃批「覽」

上諭

道光元年五月二十八日內閣奉上諭孫玉庭等奏查議海關茶船出口情形請仍照例納稅放行一摺江省江海關向准茶葉出口運往北省銷售嗣因防

其載往閩廣禁止販運上年經該撫奏請弛禁而給事中孫世昌又以事多流弊請仍飭禁茲據該督等詳查江海關出口茶船與閩廣浙省之船可以利涉深洋者不同舵水人等又不能諳習南洋沙線勢難偷越自係實在情形著照舊例凡北赴山東天津奉天等處茶船仍准其納稅放行其向由內河行走輪稅者照舊禁止出洋不容紊越該督等飭知管關道員認真稽察凡遇商販出口船隻查明給與關牌稅單行知所往口岸覈實查驗如有携帶違禁貨物偷漏出洋之事即行截拿治罪若守口員弁私行縱放一併嚴參懲辦勿得視為具文欽此

李鴻賓摺

安徽巡撫臣李鴻賓跪奏為蕪湖關一年期滿徵收正稅盈餘各銀數遵例儘收儘解恭摺具奏仰祈聖鑒事案准部咨嘉慶四年三月十八日欽奉上諭各關情形不同所有盈餘數目自應酌中定制已于戶部所奏各關盈餘銀數清單內經朕查照往年加多之數分別核減自此定額之後倘各關每年盈餘于

新定之數再有短少即行著落賠補如有多餘亦即儘收儘解其三年比較之例著永行停止等因欽此并奉欽定蕪湖關戶稅盈餘銀七萬三千兩工稅盈餘銀四萬七千兩欽遵在案今蕪湖關自嘉慶二十五年五月初二日起至道光元年五月初一日止一年期滿據委管關務安徽道祥瑛將徵收戶稅正額銀一十五萬六千九百一十九兩八分工稅正額銀七萬一百四十六兩一錢六分戶稅盈餘銀八萬一千六百六十五兩二錢五分工稅盈餘銀四萬九千一百六十六兩三錢八分通共正稅盈餘銀三十五萬七千八百九十六兩八錢七分詳請具奏前來臣查該關本年徵收戶稅盈餘銀八萬一千六百六十五兩二錢五分工稅盈餘銀四萬九千一百六十六兩三錢八分較之新定數目戶稅計多收銀八千六百六十五兩二錢五分工稅計多收銀二千一百六十六兩三錢八分統計戶工兩稅共多收銀一萬八百三十一兩六錢三分比較往年有餘無絀所有蕪湖關徵收戶工稅課正盈數目儘收儘解緣由理合恭摺奏明伏乞皇上聖鑒謹奏道光元年六月初十日奉硃批該部知道欽此

五月二十四日

達 三摺

奴才達三跪奏爲關稅一年期滿據實陳明仰祈聖鑒事竊照淮宿海三關稅課通計正額盈餘銀三十八萬五千三百六十三兩六錢二厘內淮關正額銀二十萬一千六百三十九兩六錢二厘盈餘銀十二萬一千兩宿關正額銀四萬八千八百八十四兩盈餘銀七千八百兩海關正額銀三千八百四十兩盈餘銀二千二百兩今自嘉慶二十五年五月十二日起至道光元年五月十一日止統計一年三關共收銀二十五萬二千二百一十一兩一錢四分五厘內除淮海二關正額徵收數足並海關盈餘足數仍溢餘銀一十三兩一分外其淮關盈餘共收銀八千六百一十二兩七錢二分四厘計少收銀十一萬二千三百八十七兩二錢七分六厘宿關正額盈餘共少收銀二萬七百七十八兩一錢九分一厘比較定數淮宿二關共短收銀十三萬三千一百六十五兩四錢六分七厘伏查淮宿關稅以黃河豆載爲大宗淮關所過豆船總由宿關順流南下故淮宿關稅之豐歉總視豆船之多寡上年五月十二日開徵後豫省

儀工尙未合龍西河豆船不能運載來關截至十二月初八日儀工合龍計日半載有餘已少收銀十萬八千六百餘兩而合龍之際時值隆冬冰凌未解船隻不能通行迨本年正月下旬豆船陸續抵關又值上游徐邳各屬去歲歉收所存雜糧豆貨就近接濟民食赴南銷售無多是以稅額徵收終難敷足曾經奴才附片陳明奉到硃批覽欽此欽遵在案奴才檢查檔冊嘉慶二十四年關稅豐盈西河船過關二千六百四十八隻本年西河船過關七百五隻船數少至一千九百餘隻銀數遂少至十三萬餘兩此淮宿兩關征收短絀之實在情形也奴才荷蒙皇上天恩畀以錢糧重任乃前因黃流未通征收短絀而合龍之後仍不能趕補足額撫衷惶悚無地自容惟有仰懇聖慈將少收銀十三萬三千一百六十五兩四錢六分七厘著落奴才名下照數分限賠繳並請將奴才交部議處以爲關稅虧短者戒至淮安倉項下收茶稅銀九十六兩七錢九分二厘海關收海船樑頭鈔銀四百五十七兩一錢五分六厘以上二款均係儘收儘解遵例無庸比較其淮關盈餘項下例應提存辦公銀一萬兩若盈餘不敷准於正額撥留本年淮海二關盈餘銀一萬八百二十五兩零因火耗經

費不敷照例動支銀八千四百六十一兩三錢六分八厘所餘銀兩不足提存之數仍請循例在於正項銀內提存辦公呈報內務府核銷合並聲明除將撥解銀兩並支銷各款照例造冊送部查核另疏具題外所有准宿海三關一年征收稅銀數目理合恭摺陳奏伏乞皇上慈鑒謹奏道光元年六月十二日奉硃批另有旨欽此 五月二十八日

達三摺二

奴才達三跪奏爲奏聞事竊照淮安關盈餘項下每年提存辦公銀一萬兩若盈餘不敷例於正款撥留俟支銷餘剩後奏明解交內務府節經遵行在案今自嘉慶二十五年五月十二日起至道光元年五月十一日止淮海二關僅收盈餘銀一萬餘兩除照例動支火耗不敷餘八千四百六十一兩零下餘銀兩不敷提存之數仍循例在於正額項下提存辦公銀一萬兩內給發過淮宿海三關委員養廉飯食共銀八百九十二兩八錢實存銀九千一百七兩二錢除循例造冊送部查核外所有支銷餘剩銀兩存俟解餉之便搭解內務府交納

理合恭摺具奏伏乞皇上聖鑒謹奏道光元年六月十二日奉硃批該衙門知道欽此
五月二十八日

達 三摺三

奴才達三跪奏爲奏聞事竊照淮安關向有飯食罰倍二款經部議定留爲充賞公用等項如有餘剩統於關期報滿時奏明解交內務府歷經遵辦在案今自嘉慶二十五年五月十二日起至道光元年五月十一日止計一年共收飯食銀五千三百七十六兩三錢九分五厘查出漏報罰倍銀七千一百五兩五錢八分五厘照例充賞並動支一切公用及添補經費冊內未開各項外尙餘存飯食銀四百七十兩八錢三分一厘罰倍銀二百一十一兩二錢二共銀六百八十二兩三分一厘相應奏明俟解餉之便搭解內務府交納理合恭摺奏聞伏乞皇上聖鑒謹奏道光元年六月十二日奉硃批該衙門知道欽此
五月二十八日

